

4.

CAJETANI TACCONI

Philosophiæ Medicinæ & Anatomes
Doctōris

ATQUE IN PATRIA BONONIENSI UNIVERSITATE

LECTORIS PUBLICI

NEC NON

*In Archinosocomio Sanctæ Mariæ de Morte
Chirurgiæ Professoris*

De raris quibusdam Hepatis aliorumque
Viscerum affectibus Observationes



BONONIÆ MDCCXL.

Typis Ferdinandi Pisarri, sub signo S. Antonii. *Sup. Facultate.*

4

SPECTATISSIMIS VIRIS

Archinosocomii Sanctæ Mariæ de Morte
Moderatoribus

C A T A S A P A



'Ja de raris quibusdam Hepatis aliorumque Viscerum affectibus jampridem animadversa collegeram, atque in Commentariola mea conieceram, ut ea quidem Vestro inscripta nomini in lucem ederem, MODERATORES OPTIMI, fecit magnitudo humanitatis erga me vestra, quæ non obscuris indiciis, sed clavis significationibus declaravit elucubrationi huic meæ, si vestro in nomine eandem emitterem, præsidium favoris vestri non defuturum. Vos enim pro incredibili erga literatos homines, qui in hoc percelebri Archinosocomio Medicina dant operam, voluntate ac benevolentia vestra sic eorum auge-

A 2 *getis*

⁴
getis animos, studia incenditis, conatus & facta excipitis, ut ea nequaquam abdita remanere, sed in apertum produci si & agrotantibus commodo & medentibus usui futura sint, non solum hortando Vos velle, sed etiam monendo quasi precipere videamini. Hac igitur praeclara significatione voluntatis vestra excitatus consitui Munusculum huiusce mea elucubrationis Vobis offerre, quod esset argumentum perennis observantiae erga Vos mea, ardorisque ingenui, quo me inflammatum sentio de artibus nostris benemerendi, testimonium.



Quod



5

Uod sæpe alias circa morborum minime vulgari-
um curationes occupati facere consuevimus,
ut pro munere officii, quod in tractanda ad-
ministrandaque chirurgica facultate profitemur,
cuncta rarioris aspectus argumenta in ipso
nostrarum actionum cursu nobis occurrentia,
studiose colligeremus, nostrasque super iis anim-

adversiones candide promeremus; idipsum nunc quidem infi-
gni valdeque raro & admirabili in fœmina novissime a nobis
curato hepatis abscessu maxime admoniti pari studio & candore
agendum suscipimus. Qua in re cum in phænomena quædam
inciderimus variis non inutilium quæstionum generibus locum
concedentia, ut illa quidem ea prorsus imagine ac methodo, qua
nostris se se obtulerunt oculis exponamus, præmissa ejusmodi
abscessus descriptione distinctis primum capitibus complectē-
mur, tum adhibitis observationum rationumque momentis de
singulorum natura, et proprietatibus quid ipsi sentiamus breviter
aperiemus.

Mulier septimum & vicesimum agens ætatis annum, subgraci-
lis habitus, sicciorisque temperamenti, annis ab hinc jam septem
de stomachi & præcordiorum dolore conqueri cæpit. Dolorem
comitabantur refrigerationes exteriorum partium, anxietates,
inquietudines, vomitus materiæ biliosæ, a quo interdum recrea-
batur, interdum nihil levaminis sentiebat. Singulis duobus, tri-
busve mensibus, quandoque citius recurrebat dolor; eoque præ-
sente stomachus intus nesciebat. Accedebant tremuli nervorum
motus cum anorexia, sæpiusque crudum cum dolore ructabat. In-
terea viro nupta fuit. Ex filiis quinque, quos peperit, unum
abortione perdidit. Ex variis temporum intervallis recrudit
morbus, ac de hysterico affectu judicabatur a medicis. Alvus erat
adstricta, morboque ingruente de mucronatæ cartilaginis dolore
querebatur ægra. Quæ in bononiense archinofocomium Sanctæ
Mariz de Morte, cui nos a medicis, chirurgicisque muneribus &
officiis præfecti sumus, octavo idus quintiles præteriti anni 1739
translata curationi nostræ concredita fuit. Exacto jam puerperio
quotidie quasi defixus in epigastrica regione aderat dolor; ibique
propius ad hepatis sedem conspicuus fieri cæpit tumor paulatim
cum calore increscens, qui spatio duorum mensium vehemen-

tius auctus dolebat ad tactum, repellique manibus præ duritie haud facile poterat. Febris initium capiebat a frigore, quod excipiebat calor per horas ferme viginti vage recurrens, neque umquam ex toto in apyrexiam desinens. Cum de saniosa materia in tumore conclusa & abscessum faciente indicia non obscura haberentur, scalpello quatuor fere digitos transversos supra umbilicum a dextris linear albæ altius adacto tumor apertus est, statimque conspecta sanies quatuor fere unciarum pondere inde erumpens cum septem calculis. Specillo primum, mox digito auriculari intra vulnus altius immisso, abscessum valde amplum & profundum agnovimus, ejusque labia dura & inæqualia; anteriorem vero ambitum mensuram quatuor fere digitorum explere. Altera die parem saniei copiam eduximus cum tribus calculis: tertia uberiorem, roseique, sive lateritii coloris æmulam, calculisque quatuor supra viginti refertam diversæ magnitudinis & figuræ: quos inter unum cæteris longe præstantem, majorisque myristicæ nucis persimilem offendimus, quem forcipe extraximus. Quarta die undecim calculos, quinta duodecim, saniei vero quantum prius abscessus reddidit. Calculus, quem majorem nucem myristicam imitari diximus, si excipiat, alii triangularem figuram, alii pentagonam mentiebantur, varioque colore ex albido, subviridi, croceoque hic illic tincti erant. Aliqui duo, nonnulli quatuor, quidam octo, novem, quatuordecim pendebant grana. Fasciis & linamentis, quibus obducebatur vulnus, die quartadecima avulsis, colorem subluteum ac viridem inluisse vidimus, quem a bile profectum & quidem cystica, ex eo deduximus, quod bilem, quæ tunc inde scatere caput, summe amaram gustu deprehendimus. Die decima quinta eadem observabantur: acerbus tamen sensus & dolor, qui manu regioni stomachi & hepatis ad explorandum admota initio morbi plurimum augebatur, remisit. Ex quo autem bilis prodire caput, splenia & vincula foramini abscessus apposita, tum horis vigintiquatuor exactis soluta, quasi tinctura viridis æris suffusa deinceps virescere visa sunt. Ac de bile quidem fluente certam nobis fidem faciebat color & gustus, quam data opera colligentes, ac ponderantes quatuor interdum uncias pendere comperimus. Interim ea decedente exulavit febris. Jamque ad quadragesimam quartam diem morbus processerat, cum

alius

7
alius una cum bile emerfit calculus ponderis granorum sex.
Alvus, quæ erat adstricta, lenientibus solvebatur. In progressu
ad sexagesimam usque diem bilis tantummodo circa auroram &
vesperam non paulatim fluendo, sed confestim quasi saliendo
elabebatur. Quinquagesima vero die stomachi dolor mane re-
cruduit: vespere autem tria vel quatuor membranarum frustula
tenuia & lata, subcroceo colore infecta deposuit alvus cum fa-
cibus. Quibus exturbatis effusio bilis statim decrevit, ventris de-
jectiones, cæteræque vitæ functiones in naturalem statum reversæ
sunt. Parva tamen remansit fistula, per quam scrupulus fere unus
dilutioris & subamaræ bilis tempore unius diei emittebatur. De-
nique dies jam quatuor & septuaginta ab aperto tumore, octua-
ginta vero novem a morbi initio effluxerant, cum domum suam
rediit mulier, ubi octidui spatio fistula penitus occlusa plene
convaleuit.

Jam vero ut ea, quæ super allata morbi historia animadver-
siones nostras præceteris postulare non immerito visa sunt or-
dine proponamus, primum argumenta tumoris & abscessus se-
dem in hepate evincentia proferemus. Hæc autem cum ex dolo-
re in epigastrio juxta hepatis regionem mulierem affligente,
qui & ad tactum exacerbabatur & subjectum non exiguæ ma-
gnitudinis tumorem manui offerebat & alvi stipticitate ac febre
stipabatur, initio satis proderentur, ubi tamen sectione adhibita
tumor apertus fuit, indeque effusa sanie tumoris & abscessus
sinum specillo & auriculari digito explorare licuit, præclare
innovit tumoris locus, alius nimirum in substantia hepatis e
directo & proxime ad vesicam fellis primum excitati, tum ab
congesta intus materia sensim in magnum abscessum ita diducti
ut ad peritonæum ipsum contingendum, urgendumque pervene-
rit in indicata lineæ albæ parte, ubi scilicet scalpellus intus ada-
ctus saniei exitum patefecit. Ex bile vero, utpote quæ gustui
amara deinceps per vulnus diutius effluxit; itemque ex calculis
ingenti numero illhac emissis, communesque cum cysticis notas
sortientibus (ut ex infra dicendis constabit) indicia adhuc cla-
riora mox dictam in hepate tumoris sedem, ejusque cum vesicula
fellis conjunctionem & commercium ostendentia relaxe-
runt.

Materiæ vero ichorosa & putrescentis copiæ tribuendam esse
exi-

existimavimus molem valde amplam & profundam tumoris huius ab ima & concava hepatis fede per gibbam ejusdem partem usque ad peritonæum protensū, atque intra membranofum folliculum verosimiliter conclusū. Nam id quidem tumoribus intra glandulosa cum hominum, tum animalium viscera genitis non infrequenter accidere compertum est, ut pravam scilicet eorum materiam membrana undique tumorem investiens, primis saltem temporibus, coerceat, absque ulla, vel certe cum insensibili œconomix animalis jactura, dum reliqua nimirum visceris molles integra & incolumis remanet. Ejusce porro membranosi folliculi testimonium tulisse videntur membranarum frustula per sedem ejecta, quamquam non eo numero ut simul unita & dimensa universum abscessus ambitum circumplecti possent. Quod ex eo fortasse contigit, quod pars earum valde attrita, vel in pus conversa inconspicua per ulcus cum pure exierit, pars vero per alvum confusa cum fecibus.

Cœterum ne illud quidem a ratione alienum est, nempe membranarum id genus, quæ per alvum ejectæ sunt, particulas aliquas a vesicæ fellæ tunicis avulsas prodiisse, eo præsertim tempore, quo recluso cystico ductu ita egredi visæ sunt, ut eas nec ab intestinis, nec ab utero, nec ab urinaria vesica, nec a vicinis partibus, nulla quippe morborum nota affectis, nec demum a cibis, aut medicamentis progredi potuisse cognoverimus. Neque enim dubitandi locus nobis relictus est, quin prope id tempus, quo scapello tumorem jam dictum incidimus, disrupta fellis vesicula vulnus & ulcus contraxerit ea in parte, qua hepati uniebatur, sicque per illius vulnus & calculis & bili transitus exitusque per sinum tumoris & ulcus apertus sit. Saniosæ autem abscessus materix vesiculam fellis imperviam fuisse, videlicet respectu cystici ductus a calculis fortasse obstructi, ejusque partis, quæ hepati opponitur, ex eo satis didicimus, quod nulla umquam in fecibus saniei vestigia deteximus; quodque erosa & vulnerata circa fundum, vel inferiorem partem vesicula difficillime ab interitu arceri ægra potuisset.

Calculi igitur incredibili numero & varietate per abscessum primo cum sanie mixtim emissi, mox in dies cum bile diutius exclusi, deinde bilis ipsa colore, consistentia, sapore cysticam bilem redolens copiosius effusa, postremo exploratio per specillum
& au-

& auricularem digitum intra sinum abscessus, educto jam pure, alius intrusum non semel facta, apertum quod diximus vulnus & ulcus in superiore vesiculæ felleæ parte nobis fere ob oculos posuisse videntur.

Ut ergo præscriptum nostris animadversionibus ordinem prosequamur, nonnullas observationes super indicatis calculis, bilisque effluxu a nobis factas subijciemus, ab iis quidem, quæ ad calculos referuntur, exorfi.

Calculos, quos primum cum ichorosa materia, deinde cum bile e vulnere inflicto prodiisse narravimus, quamvis ex allatis ante rationibus e cytti fellea profectos, vereque cytticos esse moneremur, placuit tamen alia venari & persequi argumenta genuinis eorum cum cytticis notas uberius ostendentia. Primo nonnullos eorum flammæ admovimus, vidimus autem eandem nonnihil alere, atque inter ardendum crepitare. Secundo ex lamellis, sive stratis quibusdam sibi mutuo superpositis eosdem coagmentatos fuisse; primam vero lamellam ex albo flavam, secundam viridem apparere. Tertio fere omnes in aquam projectos fundum petere. Quarto eosdem diffractos nucleum laxioris compaginis nullius determinatæ figuræ, coloris vero saturatoris ostendere, sicque signa communia cum aliis calculis a Morgagno in suis adversariis tertiis elegantissime descriptis, atque a nobis aliisque in quamplurimis vesiculis felleis hominum repertis exhibere comperimus.

Nostram quoque sententiam confirmare visi sunt illi calculi, quos in pori bilarii propaginibus interdum offendimus, cum & flammæ admoti citius inflammarentur & pondus respective gravius exhiberent. Quod cum ab exuberantia particularum bilis saturatoris, aquosis deficientibus, pendere arbitraremur, compage proinde illa laxiore eos caruisse cogitabamus, quam adipisci consueverunt, qui diutius intra cyttim felleam commorantur.

Dum in scrutanda huiusmodi calculorum natura versabamur, quanta sit eorum perniciēs, quamque diris cruciatibus hominum vitam exerceant animo revoluentes, studio assequendæ artis trahebamur, cujus beneficio effici posset, ut ii vel nusquam concreverent, vel fracti & dissoluti ab humanis visceribus tandem pellerentur. Quo in studio licet revera nihil profecisse,

B

hæc-

hactenus fateamur, tamen pro benefaciendi voluntate quid ultro egerimus candide aperiemus. Sed cum ea, quæ in hanc rem cæpimus experimenta neque unius generis sint, neque temporis, hic paucis ea complectemur, quæ ad hunc locum pertinent, reliqua in sequentibus prosequemur. Calculos itaque aliquot ex jam dictis accepimus, quorum unum spiritui vini dephlegmato impositum descendere observavimus ad fundum vasis, ibique invariato vini spiritu consistere quindecim dierum tempore sine ulla molis, figuræ, ponderis mutatione. Pari ratione insolutum ac impermutatum repperimus alterum, quem intra spiritum aceti aliquandiu detinuimus. Tertius vero, quem spiritui nitri infudimus, intra ipsum natando perspicuam liquoris substantiam in confusam & turbidam vertit, colorem subcroceum acquisivit, & tenerimus evasit. Subcroceo pariter colore digitos inficere, adhibita prius levi frictione, visi sunt varii id genus calculi intra muriam tepidam saponis veneti aliquandiu detenti non sine eorum ponderis incremento. Intra alios præterea liquores injectis calculis alia tentavimus experimenta, de quibus, ut paulo ante monuimus, erit infra dicendi locus.

Jam de bile per vulnus jam dictum emissa ut sermonem ineamus, opportunum duximus periclitari quantum bilis una die ab eodem efflueret. In quem finem splenia, repagula, fascias, quæ vulneris orificio apponi debebant, lance ponderabamus, transactis deinde horis 24., explorato iterum pondere, inveniebamus priore detractio bilem, quam linamenta attraxerant, & vulnus emilerat, unciarum trium & drachmarum sex ponderi respondere. Deinceps vero sequenti artificio usi sumus. Plumbeum vas infundibuliformis figuræ rostro instructum, idest tubo o recurvo, altera sui extremitate in supremam ejusdem vasis oram infixo & hiantē; altera in frustulum vesicæ bubulæ marsupii instar eidem alligatum appensumque inserto, ita apponebamus ad os vulneris, ut bilis intra ipsum paulatim fluentis quatuor fere uncias spatio horarum vigintiquatuor colligeremus.

Porro hujus bilis, quam ex amaro illius sapore, aliisque supra memoratis notis cysticam esse deduximus, binas uncias & semis chymicæ analyti per ignem subjecimus. Calore interim per gradus aucto multum phlegmatis, parum olei nigri, nihil salis volatilis, saltem sensibus patens retulimus. Absoluta destillatio-

ne,

ne, refrigeratis vasis, fractaque retorta, nigram fuliginem, omnis saporis expertem, ipsius parietibus circumjectam invenimus & materiam pariter nigram in retortæ fundo particulis splendentibus. & salinis refertam. Huic fuligini unciam unam, & semis ejusdem bilis (consulto a nobis servatæ) reafudimus, factâque totius humidi evaporatione, nigras item particulas fundo vasis inhærentes adspeximus: portioni hujus materiæ adjunximus sales alkalicos, nullus tamen odoris halitus olfactum ferit, nec ulla coloris mutatio contigit. A fale ammoniaco superaffuso odor urinosus, hujus spiritus more, emissus est. Spiritus etiam acidus alteri parti dictæ materiæ affudimus & magnam excitari vidimus effervescentiam, colore eodem perseverante. Pars altera ejusdem materiæ calcinationi exposita, more salis tartari fusa est & in colorem albidum versa. Lixiviatione autem facta cum aqua calida in albidum colorem mutata est, & alba terra fundum vasis petiit. Dicta solutione per chartam emporeticam filtrata, terra quædam alba remansit parvis quibusdam arenulis subnigris, durisque conspersa. Coagulata denique eadem solutione radiorum solarium ope, oculis apparuit sal albus fixus figuræ inæqualis, qui supra carbones accensos positus, liquatus fuit sine ulla crepitatione, parte aliqua fixa & nigra superstitite.

Priusquam vero phænomena reliqua super indicato bilis effluxu a nobis deprehensa proferamus, consultum duximus quædam attexere morborum historias, cadaverumque sectiones, quæ sicuti ingentem nobis fecerunt ejusmodi calculorum copiam, quos ad examinandum assumpimus, ita etiam signa præsentiam eorum in cysti felleæ ostendentia, fortasse nondum satis pro merito animadversa, præbuerunt.

Mense octobris anni 1725. helveticæ cujusdam mulieris dissectum cadaver inspeximus. Jecur durissimum & naturali magnitudine longe amplius materiam quamdam frigidissimam undique fere per totum dispersam continebat intra peculiare veluti capsulas conclusam. Ductus bilarii prope omnes una cum choledoco calculis referti erant, quorum duo supra quinquaginta numeravimus, superficiæ durioris & lævis, differentis magnitudinis, figuræ in plerisque octaedricæ, in quibusdam vero, præsertim majoribus, cuboideæ. Bile quasi heterogenea nempe diluta, subdulci, mucosa replebatur cystis fellea, quæ grandio-

rem pyrum æquabat, cuius intermediam tunicam occupabant glandulæ phaeoliformes, primum quidem a Malpighio nostro, deinde ab aliis, speciatim vero a Gusmano Galeazzeo cum calculis eas replentibus, in actis bononiensis scientiarum academix descriptæ. Mulier hæc quinquagesimum quintum ægens fuit ætatis annum, temperamenti melancholici, habitus corporis gracilis, nonnullis febribus lentis, atque contumacissimis detenta paulatim ictericæ morbo correpta fuit. In hepatis regione indicatus tumor sentiebatur ad tactum durus, at sub mucronata cartilagine, perinde ac si in ipsa sedem fixisset morbus, angustæ præcipuo quodam dolore mulier afferebat. Parum, vel nihil comedebat: immaniissimi vomitus a cibo aderant: spatio quatuor, vel quinque mensium, ictero permanente, ex inedia tandem mortua est.

Mense item januario anni 1726 cadaver aliud bononiensis mulieris annorum septem & quinquaginta secimus. Illico corpus quoddam durum, lapideum, nigri coloris, superficie granulosa, magnitudine parvam avellanam nucem, sive magnum morum referens invenimus, quod ita vesiculæ felleæ ostium, sive eiusdem colli principium occludebat, ut fortasse ne guttula quidam bilis per ipsum ad communem ductum nempe choledocum facile transferri potuisset. Huius mulieris hepar substantiam durissimam nactum, tuberculis circumquaque refertum, naturalem magnitudinem valde excedebat. Ad lienem etenim protendebatur, totam ventriculi molem operiebat & ultra umbilicum exporrigebatur. In cysti autem felleæ (cuius interna membrana albida, rugosa, crassa, maleque affecta erat) bilis vices gerebat materia quædam fluxilis, subalbida, sero, sive dilutiori lactici similis.

Cum tunica valde aspera & simplici induta hæc mulier, vigente hyeme, nudis pedibus & tibiis incederet, a quartana febre continua prehensa fuit, cui immaniissimi dolores in hypogastrica regione adiungebantur. Quinta recurrentis febris accessione, oblitteratis fere arteriarum pulsibus, extincta est.

Quod vero a multo jam tempore clarissimi viri Fernellius, Riolanus & postea etiam Morgagnus observavit, nimirum calculos una cum facibus per sedem ejectos fuisse, id & nos ipsi observavimus anno 1724. in nobili muliere, cui medicinam face-

re jubebamur, quæ cum de mucronatæ cartilaginis, nec non hypochondrii dextri tensione, doloreque hepatis (quod tumore duro affectum ex tactu judicabamus) quereretur, luscitatis doloribus itatim icterica evadebat. Verum elapsis quatuor, vel quinque diebus, nonnullorum forsan remedium auxilio, liberabatur. Quod etiam aliis temporibus succedebat, dum per alvum exturbari cernebantur calculi variz magnitudinis & figuræ, eiusdemque ferme conditionis ac ii, quos in sua retulit scripta Morgagnus, quorumque item mentionem facit David Christianus Vaiterus in actis eruditorum germanicæ (a) & Fridericus Hoffmannus (b) ubi de mercatore quodam icteritia, althmate convulsivo, et hydropelaborante, ait, quod *post sumptum corticis sambuci medii infusum, non modo aliquoties vomuit, sed etiam per alvum aliquoties exoneratam, ultra tredecim calculos, qui erant triangulares & partim quatuor partim duodecim grana pendebant, reddidit, unde quidem malorum suorum per aliquod tempus levamen percepit.*

Prædictis affinem addimus historiam alterius mulieris annorum 63. tempera nenti sanguineo bilioli, habitus corporis ad obæsum accedentis, viginti annorum cursu nephriticis doloribus per intervalla temporum obnoxia. Dum infantulos in lucem emittebat, ita magnis cruciatibus, doloribusque vexabatur, ut pene mori videretur. Decennium per mariti mortem vidua in curis familiaribus obeundis multum occupata a variis febribus, doloribus infimi ventris spasmodicis, lassitudinibus membrorum & artuum male habuit. Post sex mensium labores in serico opere parando conficiendoque exanthlatis, post graves animi affectus, iterum febres cum anorexia, doloribusque tum in hypogastrica regione & præsertim circa ultimas lumborum vertebra, tum in hepatis sede experta est. Permolestum dolorem patiebatur in mucronata cartilagine. Dejiciendi difficultate tenebatur, nec sine magnis cruciatibus conatibusque excrementa deponebat, fortasse ob tumorem satis durum sub pubis regione tactui occurrentem. Ajebat enim se in facibus emittendis insignem quempiam globulum percipere, non aliter fere ac si infantem esset paritu-

(a) Pag. 127. observatione 92. (b) Lib. Consult. Sect. 3. Casu 57. de ictero diuturno.

ritura. In hepatis regione tumor item durus, magnus, atque inæqualis non solum manibus discernebatur, sed etiam oculis apparebat, a quo multum dolebat. Icterus niger supervenit. Urinæ reddebantur virides, nigræ, cum sedimento albido puris formam præferente. Lingux cuticula hic, illic veluti abrasa conspiciebatur: irriti vomendi conatus aderant: aliqua abdominis intumescencia: alvus adstricta erat. Accessit vomitus materiæ nigræ, viridis, viscidiusculæ, febris adaucta est, doloresque intensiores redditi. Corporis membra absumpsit macies. Anno tandem 1735. mense martio e vita migravit.

Secundo cadavere in infimo ventre materia serosa, flava & ad rubrum accedens ponderis trium circiter librarum reperta fuit. Centrum intestini recti obsederat tumor durus scirrhusus partem dextram magis respiciens magnitudine quatuor uncias, profunditate unam & dimidiam æquans. Hic tumor intestinum, rectum parte sui anteriore amplectebatur, atque ita extra propriam sedem urgebat, ut dextrorsum illud flecteret, summeque coarctaret.

In concava hepatis parte tumor pariter scirrhusus cernebatur ejusdem magnitudinis pari fere ratione obtegens & amplectens vesiculam fellis. Uterque a peritonæo originem suam ducere videbatur. Sed qui in jecore radices ageret tumor, intestinum duodenum prope ipsum jecur summe adduxerat & ductum choleodum, cysticum & hepaticum valde compresserat, ut breviores longitudine naturali conspicerentur. Hepar satis amplum hic, illic tam in superficie externa, quam in internis partibus tumoribus non admodum duris scatebat. Propagines omnes pori bilarii humore nigro, viscidoque turgidæ, ac repletæ crusta quadam nigra obducebantur, quæ dum digitis trahebatur, cuticulam, figuram internam vasorum exprimentem, ostendebat.

Dum descriptus tumor cultro examinabatur e vesicula fellis sinistro in latere vulnerata, centum quadraginta quinque calculi colore, figura & magnitudine fere æquales educti sunt. Vesicula fellis naturali amplitudine duplo fere major, ea in parte, qua hepar respiciebat, stigmata quædam ferebat intrinsecus figuram basium, sive facierum calculorum, qui eidem adhæserant, representantia. Calculi omnes figuram thetrædricam servabant,

vabant, ad albidum, sive dilute croceum colorem accedentem & vesiculam fellis totam replebant.

Cum perquirendæ horum calculorum naturæ, subsidio nonnullorum agentium, operam posuerimus, locus proinde admonet ea in medium asserre, quæ de illorum habitudine & affectionibus observavimus, quæque ut pars altera earum, quas supra retulimus, observationum ad hunc locum spectare videbantur. Calculos igitur ex præfatæ mulieris vesicula fellis ex nptos granorum circiter senum pondus singulos habere comperimus, atque, ex squammulis compositos tenuibus, albicantibus, lucidis, argenteam matris perlarum interiorem faciem simulantibus, quem admodum ex nonnullis eorum diffractis agnovimus. At circa meditullium croceo colore tinctos, parvisque globulis splendentibusque & subrotundis præditos, quos, dum in pulverem, digitis redigebamus, friabiles, viscidos, resinosos, ingratumque odorem spirantes deprehendebamus.

Intra vitrioli spiritum horas quatuor & viginti detenti nullius effervescentiæ, nulliusque mutationis indicia præbuerunt. A spiritu item sulphuris, nitri, ab aqua regia, a spiritu therebentinæ, salis armoniaci, salis communis, a rore majali destillato, a solutione mercurii, a spiritu vini adhibitis & affusis nihil mutati sunt: si modo nonnullam saporis in amarum & ingratum conversionem excipias. Nullam pariter mutationem passi ab aquis siue fuerint naturales & simplices, uti puteales & pluvix, siue ex vegetabilibus destillatæ, siue adjectione tartari solubilis, salis anglici, aliisque cathartici salis in eis soluti præparatæ. Nisi quod ad ima devoluti, ubi in calidis & ebullientibus aquis parvo etiam tempore permanissent, emolliebantur, ut vel levi digitorum compressione in pulverem resolverentur. Ubi vero candelæ ardentis flammulæ admoti ignem conciperent, scintillas jaciebant ignitas, albas & salium more crepitabant, solvebanturque inftar ceræ. Supra prunas candentes coniecti pariter liquecebant ingratum bituminis odorem redolentes, sed tandem combustis absolvebantur, nullum terræ vestigium relinquentes, quod in variis bituminum speciebus relinqui solet. Igni obiecti supra laminam ferream distuebant, deinde cogeantur a frigore. Liquati vero ad ignem, addita una vel altera olei olivarum gutta, unguenti mollioris & ductilis formam induebant.

Destil-

Destillatio duodecim horum calculorum, quorum pondus erat unius drachmæ cum dimidio per retortam instituta fuit & igne juxta artis chemicæ methodum adaucto, in principio guttulæ phlegmatis numero paucæ apparuerunt, deinde oleum satis limpium, sed subobscurum, odoris ingrati ea ferme ratione, quam oleo ceræ destillationi expositæ observari solet. Hoc oleum post aliquod breve tempus nigrum evasit & una cum phlegmate ad pondus quatuor scrupulorum ascendit. Vasis frigefactis caput mortuum e retorta extractum est, quod erat nigrum, lucens, & tali rarefcentia & levitate donatum, ut levissimo etiam flante aere statim more phlegmatis sanguinis humani post destillationem in auras dispergeretur. Cum descripto capite mortuo spiritus acidi & corrosivi commixti nihil mutationis attulerunt: dum vero illud supra ignem conjiciebatur, fumum aliquem emittebat fortasse, quia præcedens ignis vi caruit separandi quod remansit ratione fuliginum descendendum tempore destillationis supra materiam destillatam, ut in omnibus ferme destillationibus succedit.

Positi autem simul cum sapone calculi in vase ferreo ad ignem non tam cito liquati sunt & facta agitatione unio quædam, veluti grumulorum laxa & imperfecta emerfit, quæ ostendebat corpora hæc duo haud quaquam amice consociari. Materia hæc supra prunas accensas injecta abijt in halitum & fumos, qui odorem urinosum præseferebant. Ex hisce observationibus inferri posse videtur, calculos hosce constare ex principiis sulphureis, quibus cum unitur pars aliqua nitri fixi & modica phlegmatis portio.

Studio rei medicæ colendæ & illustrandæ naturam hujusmodi calculorum paulo minutius persecuti sumus. Hanc enim licentiam nobis tribuit medica facultas, ut quodcunque consideratione non indignum occurrat, id nostro jure liceat contemplari, præsertim ubi illecebra lucrandæ ullius utilitatis nos movet.

Fructum vero utilitatis sane non exiguum in signis præsentiam calculorum id genus in iëtero præmonstrantibus colligendis, adeoque in diagnosi morbi regii dum a calculis produci turelicienda, nostrarum observationum ductu consecutos esse nos remur. Nam cum sæpe iëterus a calculis biliferos ductus obstructibus enascatur, ambigua & obscura remanent calculorum signa, quotiescumque hi longius a puncto concursus hepatici distans

At cum cystico in alterutro eorum sedem sortiuntur, nec omnis descensum bilis ad intestina præpediunt. At ubi propius ad prædictum concursus locum compulsi choledocum sive communem ductum subingrediuntur calculi, tunc omni præcluso bili exitu contumacissima sequitur aurigo; in qua & albidæ facies & in primis dolor mucronatæ cartilaginis (notante diligentissimo Jacobo VVepffero) & spasmodica tensio dextri lateris & totius corporis lassitudo veluti spontanea, producentis causæ, scilicet calculorum specialiora exhibent signa, quæ tamen non eadem sunt (docente Friderico Hoffmano) (a) *sed diversimode comparata prout, vel ingens calculus vesicam ipsam male afficit, vel plures per ductum choledocum transsum moliantur.*

Quoniam inter ea signa præcipuum, ut diximus, locum sibi vindicat dolor cartilaginis mucronatæ, opportunum existimavimus rationem et viam, qua ille ad eam partem pertingit, anatomia docente, proponere & explanare.

Anatome enim constat jecur quamplurimis nostri corporis partibus per varia ligamenta validissime alligari, ligamentum vero latum membranaceum, suspensorium dictum, e magna hepatis fissura exurgens, cartilagini ensiformi altero sui extremo, nempe superiori (licet in aliquibus hominibus magis versus partem dextram) appendi; hincque aliquando dextrorsum, sæpius sinistrorsum ad lineam albam, altero sui extremo, nempe inferiori protensum ab hepate, aliisque ligamentis, ac speciatim ab umbilicali ita expansum contineri, ut oblongum, ac irregulare quasi parallelogramum (peculiari etiam icone a Van-reverhoft depictum) efformet. Qua vero parte hepati unitur versus interiora ejus descendere & communi fere involucro ramos nonnullos venæ portæ, arteriæ hepaticæ, nervorum, ac ductuum biliarium circumvestire.

Hujus ergo membranosi & validi ligamenti ope dolorem illum ad sternum excitari evincunt illius nexus, positus & figura; quia cum arte conjungatur cum biliferis tubulis & consistat ex fibrillis distractilibus, elasticis & sensus exquisiti & superiore sui extremo cartilagini xyphoidi ac sterni fortius quam alitias

C

figatur,

(a) *Setl. prima Cæp. VII. ubi de causis Morborum & quidem lateribus, recte cognoscendis.*

figatur, propterea ejusdem fibras, quum a calculis intra bili-feros canales sitis & exitum molientibus acrius percelluntur; magnopere tendi, distrahi & concuti necesse est & ea quidem in parte vehementius, ubi vis distractionis validius exercetur: nimirum in regione prædictæ cartilaginis & sterni, cui utpote robustiori termino firmitus quam diaphragmati, peritonæo, lineæ albæ, cæterisque partibus termini laxioris rationem habentibus, ligamentum illud adhærescit.

Distractionis autem vis quæ major fuerit, eo acerbiorum dolore parit, qui pro varia calculorum magnitudine, figura, motu augeri & minui manifestum est. Idque apparet in calculis renum ureteres, vesicam urinariam, urethramque permeantibus, qui glabri, molles, parvi, calculosos mitius angunt, præduri, grandes, asperi, crudelius. Quod pariter de cysticis cum proportionē dicendum est.

Qui vero propius ad finem choledochi ductus in duodenum intestinum hiantis infixi locantur calculi, ii si & acuminibus instructi & molis fuerint non exigui, vomitum movent, contractisque suspenforii & lati ligamenti fibræ ensiformem cartilaginem nonnunquam introrsum trahunt. Quare immanes stomachi dolores inferunt, qui cum cardialgicis facile confunduntur. Quod ab Joanne Christoforo Hertio observatum legimus (a) scribente, hominem quemdam ex hydropem mortuum, tresque insignes calculos in cysti fellæ gerentem, priusquam in hydropem incidisset, cardialgico dolore tam diu vexatum fuisse, ut morbi causam in ventriculo residere Medici non dubitaverint. Cardialgici vero doloris in his casibus fomes est *magna consensio ventriculi & annexi duodeni cum ipsis biliaris ductibus* ut apposite ait Hoffmannus (b) *eam maxime ob causam, partim quod ductus choledochus per duodeni membranas feratur, partim, quod dexter nervi intercostalis & parvis ostiis ramus, qui ventriculum adit, ramum quoque ad hepar ejusque biliferos canales mittat.* Ob magnam etiam duritiem in hepate exortam, aut in poro biliario, tumores scirrhosos nasci, contumacem icterum & ventristurbationes sequi, coctiones vitari, totius æconomiz animalis ordinem præverti, corpusque contabescere adnotavit Malpighius.

Ite.

(a) In *actis Eruditorum Germania* p. 227. ob. 91. (b) T. 3. sect. prima Cap. V. de consen. Part. Nervos: &c.

Isterum ut plurimum in Ascitem converti monuit Dodonæus, qui viscera ictericorum diligentissime contemplatus jecoris partes duras lapillis ubique refertas non semel invenit. Notum enim, est deficiente bilis fluxu ad intestina motum illorum peristalticum sensim minui, Chylosi opus imperfectum manere, alvum adstringi, variisque morborum & ægritudinum speciebus viam sterni.

Sed ut unde orsa est, in eodem terminetur oratio nostra, ad memoratum initio hepatis abscessum reversi postremam nostrarum animadversionum partem circa efluxum & semitas bilis exponemus.

Cum supra dixerimus bilem ex sinu aperti abscessus perspectius & uberius quartadecima morbi die exire cœpisse, quibusnam elatibus illa erumperet quærentibus nobis, variz opinionum species occurrebant, quas inter ea cæteris verosimilior apparebat, quæ bilem intra cystim felleam per canaliculos, quos hepaticycticos nominant, derivatam, inde ob laceratam superne cystis tunicam, ductumque cysticum præclusum, tamquam e promptuario quodam, per ulcus apertum ejectionem transferri declarabat.

Et de soluta quidem vesiculæ felleæ unitate fidem faciebant calculi cysticorum notis & proprietatibus affecti, qui per abscessum diutius numerosa serie egredi visi sunt ex altiore ipsius cystis pænu deprompti.

Præclusum vero cysticum ductum satis superque testabatur subpallidus color alvinarum fæcum, alvusque adstricta & contumax, quæ nonnisi eiectionis per sedem pelliculis illis, quarum in historia abscessus mentionem fecimus, ad liberum & naturale excernendum fæcum officium reversa est. Indicio plane manifesto meatum cysticum ab iis pelliculis, quin etiam, ut credi par est, a calculis antea obsignatum tamdiu cysticæ bili impervium extitisse, quoad sublatis obstaculis eadem bilis ad intestina remeare posset, suæque illa amaritiei & acrimonia, quam intra cystim manendo adipiscitur, ad peristalticum intestinorum motum ciendum aptissima, alvinam excretionem promovere. Cuius acredinis expers cum sit bilis fluens per hepaticum porum, utpote quæ subdulcis est, sitque etiam dilutionis substantiæ & coloris; propterea si absque alterius bilis consortio per choledochum ductum ad duodenum progrediatur, cum præ cystica inertior sit, segnius intestina vellicat, unde & difficilius ac tardius egeruntur fæces

& colore etiam subpallido, sive dilutius flavesciente tinguntur.

Ex tarda igitur difficilique ejectione fœcum decoloratarum in laborante muliere cohibitu retentumque colligebamus influxum amaræ bilis ad intestina, vitio quidem meatus cystici a calculis primum obturati, eo videlicet tempore, quo nervorum spasms & tremoribus per intervalla recurrentibus correpta mulier querebatur de dolore cartilaginis mucronatæ, patiebaturque vomitus biliosus cum morsu ventriculi, anxietatibus præcordiorum, membrorumque perfrigerationibus conjunctos, quæ pro hysterica affectione medicis imposuerunt, cum essent symptomata a calculis intra meatum cysticum locatis & exitum querentibus producta. Quod vel ex eo præclare innotuit, quod calculis differentium illarum magnitudinum & figurarum, quas supra innuimus, tandem per ulceris ostium extrusis, exturbatisque deinde per alvum membranaceis id genus pelliculis, quas ad eundem cysticum ductum occupandum, sive a dilacerata vesiculæ felleæ tunica, sive ab attrito abscessus folliculo decisas, procedente morbo, convenisseprehendimus, præternaturalis excretio bilis ex abscessu decrefcere paulatim capit, abscessus ipse in dies magis absumi, ventrisque dejectio una cum cæteris vitæ functionibus in pristinum & naturalem statum reverti.

Cur autem suppressa naturali secretionem bilis cysticæ icterica non evaserit mulier, ratio in eo sita videtur; quod scilicet clauso cystico ductu patere non desiit porus hepaticus, per quem ab hepate derivatur bilis ad intestina, in quæ proinde fluendo cautum est ne ad habitum corporis eadem redundaret & morbi regii vestigia in eadem imprimeret.

Præter hætenus dicta favere opinioni nostræ videbamus comparisonem utriusque bilis inter se. Nam cum hepaticæ color dilutus sit, substantia fluidior & sapor non ingratus; contra vero cystica coloratur, densior, gustuque amara & acris sit, paremque huic se ostenderet bilis, quæ per aperti tumoris os fundebatur, idcirco sentiebamus eandem ex vesicæ felleæ penetralibus emissam per abscessum foras proflire.

Illud iam remanet, ut de semitis bilis, clauso osculo ductus cystici, in cystim deductæ, quid ipsi senserimus, proferamus.

Qui a glandulis tunicas vesiculæ felleæ interjectis, tamquam a fonte unico cysticæ bilis deductionem repetunt, ii cito se ambagibus

gibus liberant, nihil de aliis eiusdem fontibus & emissariis quærendis solliciti. Verum ut silentio prætereamus glandulas illas aliis officiis & usibus longe diversis inservire posse, plane obscurum est num biliferæ sint id genus glandulæ, nec iis prætermisiss non adsunt alia emissaria & diverticula bili ab hepate in cystim convehendæ accommodata.

Bilis enim secreta in glandulis jecoris perpetuo cursu per ramos pori hepatici fertur in ductum choledocum indeque pro necessariis æconomix animalis officiis ad intestina traducitur.

In vesiculam pariter elabitur bilis trajecta per quosdam peculiare furculos, qui ab ipso poro hepatico, priusquam in choledochum abeat, transversim ducti in vesiculam fellis aperiuntur perspectius quidem ad eiusdem collum, mistoque nomine, ab infertionum terminis desumpto, ductus hepato-cystici appellantur.

Hos sane ductus, quos jampridem in brutis animalibus, præcipue Bobus, quorundam non vulgariū anatomicorum solertia detexerat, in ipso etiam homine reperiri probatæ fidei auctores nostrorum temporum, iidemque anatomicæ rei peritissimi, luculentissimis elucubrationibus & scriptis nobis testatum reliquerunt.

Ut aliquos memorem; Joannes Gothofredius Bergerus anno 1702. in libro inscripto de Natura humana (a) hæc habet. *Vel eadem (loquitur de Bile) prius colligitur in vesicula ex propriorum vasculorum apicibus & ductibus præsertim peculiaribus, qui vulgo cyst-hepatici, melius hepato-cystici dicuntur, quia ex vasculis jecorariis, poroque hepatico oriundi vesicula committuntur, de quibus Glissonius (b) Bohnius (c) & Verheyen (d) legi merentur.* Fantonus in Anatomia Corporis humani Augustæ Taurinorum impressa anno 1711. (e) scribit quod *hi canaliculi duplicis sunt generis, alii enim propagines sunt ductus hepatici cuius ramificationes confociantur ramis vena porta; alii sunt tanquam radices vesicula fellæ in quam aperiuntur & bilem evomunt.* D. Garcnleot (f) asserit

(a) Cap. XIV de secretionē materiæ Biliosæ in Hepate pag. nobis 218, & 219. (b) In Anat. hepat. C. XII. (c) L. c. Prog. XVII. (d) L. c. Tr. XI. c. XV. (e) Dissertatione VI. de Hepate, Liens, & Pæcreate pag. 110. (f) In sua Splanchologia anno 1728. Parisiis edita.

serit: quod *Ces vaisseaux (hepato-cystiques) portent la bile du foye dans la vessicule du fiel. Ils sont tres manifestes dans le Boeuf, mais il est plus difficile de les trouver dans l'homme quoique leur existence y soit toujours constante. Il n'y a meme pas bien du temp qu'on les y demontre & Monsieur Verdier Chirurgien juré, démonstrateur Royal & tres-celèbre anatomiste a esté le premier qui les ait injectés a Paris & qui les ait fait voir en public. Idipsum confirmat Solertissimus VVinslouvius (a) Exposition Anatomique de la structure du Corps Humain, dicens. Le Corps de la Vessicule du côté qu'il est niché dans le foye, y est attaché par quantité de filets, qui s'avancent beaucoup dans la substance du foye. Parmi ces filets on trouve des conduits, qui font une communication entre les pores biliaires & la Vessicule. Il y a long temp qu'ils n'ont paru que dans les animaux; mais a la fin, on les a aussi decouverts réellement dans l'homme on les decouvre plus vers le Col de la vessicule qu'ailleurs & ils sont appellés conduits Cysthepatiques, ou conduits Hepaticocystiques.*

Cum ergo meatus cysticus, ut in viam redeamus, partim a calculis, partim a membranarum frustulis jam supra memoratis obstructus, toto fere tempore, quo ulcus purgabatur, aditum bili præbere non posset, id unum relinqui videbatur, ut per mox ante recitata bilifera vascula bilis commearet in cystim indeque per patulum ulceris & abscessus ostium extrinsecus resili- ret.

Neque enim persuaderi potuimus illiusmodi membranulæ veficæ felleæ collo præfixas, tanto temporis intervallo valvularum vicem obisse transitum bili in cystim concedentium, regressum vero in ductum choledochum prohibentium: quoniam etsi illæ intra cystim protensæ & pendulæ basi tumoris adhæsisent, tamen ad eam partem, in quam utpote minus offendiculi præbentem & bilis & sanies & calculi urgebantur & ipsæ membranulæ urgeri debuissent, adeoque per eandem abscessus viam extra abdomen propelli. Quod si ergo opposita ratione per alvum ex cum fecibus depulsæ sunt, ita etiam infixas parietibus internis ductus cystici easdem fuisse dicendum est, ut omnino ab introitu in ipsum bilem tandiu arcere debuerint, donec ea vis prævaleret, quæ superatis impedimentis, eas demum disjiceret, atque in intestina detruderet.

Sen-

(a) Tom. 3. editionis *Amstelodamensis* pag. 373.

Sententiæ huic nostræ firmandæ illud etiam accessit, quod quærentibus nobis num ex propaginibus pori bilarii per Jecur discurrantibus, proxime ad tumorem jam dictum erosus & reclusus, stillare in ipsum bilis & per vulnus exire potuerit, nulla adesse major causa visa est cur illis propaginibus referatis quamplurima etiam vasa sanguifera & lymphatica copiosissime per hepar repentina simul referari non debuissent, proindeque sanguinem & lympham bili immiscere. At ne guttulam quidem cruentam ullo tempore ulceris purgamentis adpersam notavimus: bilem vero potius subrusam & spissam, quam ex croceo virescentem & iluxilem, quemadmodum esse solet cum a lymphâ diluitur, nec primis temporibus, sed circa decimam quartam diem, cum sanie & calculis exire cæpiisse conspeximus. Præterea cum tumorem membrana circumvolutum tumorum follicularium more notaverimus, ab immediato cum bile hepatica commercio seclusum communicationem tantummodo cum cystica habuisse eo fidentius nobiscum constituimus, quo magis recluso ductu cystico & alvo ad naturale excernendi officium reversa, effluxum bilis ab ulcere paulatim deficere & tandem desinere observavimus, brevique post tempore curato abscessu & vulnere conglutinato, Mulierem convaluisse.

Quibus expositis consilium jam nostrum in rebus & factis, quæ ad medicum opus referuntur, studiosius examinandis patefecimus, quod pro munere officii quod profitemur non invite probatum iri confidimus.

Cum exarati hæcenus sermones nostri typis ac prælo commissi prodituri essent in lucem, ecce miserum hominem novum argumenti genus observationi animadversionique nostræ offerentem, quod cum ad rariorum historiarum censum pertinere cognoverimus, appendicis loco subnectere & publici juris facere opportunum, nostrique instituti rationi consentaneum duximus.

Erat miser ille ex eo hominum genere, qui itinerando & peregrinando ætatem conterunt. Agebat annum sexagesimum tertium, gracili corpore & temperamento ad biliolum vergente præditus. Mense Novembri, vertentis anni, cornu vibratum a bove ictum accepit in inguine, nulla sequente partium externarum laceratione, contusione tantum & dolore aliquo remanente.

re. Cum melius habere in dies sibi videretur, Genova discedens per vias & montes nivibus obsitas petiit Lauretanam Domum. Post septem dierum iter aspero quodam sensu affectus fuit formicæ in morem a scroto ad umbilicum repente. Hic triduo durans in magnum deinde abdominis tumorem conversus est, qui a flatibus cum inferne per sedem, tum superne per os erumpentibus tandem evanuit. Idibus maji apparuit tumor in inguine dextro, magnitudine ovo anserino fere par; a quo cum vehementius doleret, chirurgum quemdam adiit æger solamen & opem quærens. Ex colore rubesciente ac livido, simulque ex materia ad tactum intus fluitante abscessum arbitratus, tumorem scalpello chirurgus aperuit. Statim a vulnere materia fluida summe fetida, coloris subobscuri cum impetu foras erupit. Postera die accessit febris, lumbricusque unus albidiusculus, spithamam circiter longus prodivit e vulnere: sequentibus diebus vermes vigintiseptem per idem vulnus eiusdem indolis & naturæ, aliique præterea pauciore numero per vomitum rejehti sunt. Cum dies quatuor quievisset, sibi que satis recreatus videretur, Bononiam versus iter suscepit, pedibus conficiendum. Verum non multo post magno abdominis dolore, viriumque languore correptus cum fluxu humoris subcruenti e vulnere, binorumque vermium eruptione humi prostratus, auxiliumque implorans cum gemitu, a viatoribus prætereuntibus miseratione motis, jumento imponitur, quo vectus aliquot confecit leucas. Sed iterum jacens inter lamentationes & sordes nonnullos transegit dies. Sumebat aliquid cibi. At alvus clausa non reddebat fæces. Denique non sine magno incommodo Bononiam ingressus circa nonas junias in pauperum peregrinorum hospitium recipitur. Inde in Nosocomium delatus, expositis iis, quæ circa tumorem percussu inguinis & tumoris incisionem ipsi accidisse supra narravimus, regionem inguinis male affecti nobis perspicendam & explorandam dedit. Itaque dextro in inguine corpus quoddam productum, teres, rigidum, tumidum atque in parte superiore nonnihil contortum, duos transversos cum dimidio digitos latum, octo longum offendimus, quod in sui extremitate latiore papillam sive glandem æmulabatur a dextris rimula sive ostiolo transversim ducto instructam. Hujusce ita contorti corporis species de inversa ilei intestini portione aliqua suspicionem iniecit.

jecit. Vasa illud perreptantia valde distenta, atroque sanguine referta cernebantur. Lineolis quibusdam sive fibrillis ambebat. Digitorum pressioni aliquantulum obstitens ad imam partem dolebat magis, foetidumque odorem exhalabat. Abdomen manibus contrectari facile poterat. Pulsus erat summe debilis ac tardus, extrema corporis frigida, sudores gelidi, supervenit singultus cum vomitu materiæ sœtidæ. Hora noctis secunda flaccidus tumor supra femur dextrum relabi visus est. Hora vero quarta ejusdem noctis æger excessit e vita.

De cognoscenda morbi sede ac qualitate solliciti ad cadaveris sectionem una cum doctissimis medicis, anatomicisque non paucis convenimus, quam in re medica & anatomica versatissimus vir Petrus Tabarranni instituit. Dissectis & revulsis communibus abdominis integumentis relictisque in proprio situ musculis oblique descendentibus sub arcu, quem ligamentum Falopii, seu Poptarii appellant inter posteriorem, sive inferiorem ex binis tendinosis columnis (a) quibus eformatur annulus pro transitu vasorum spermaticorum & vasa cruralia dextri lateris supra descriptum corpus foras protrusum clare distincteque conspeximus. Quod, aperto dein abdomine productionem & partem Ileii intestini lacerati ab eo quasi penitus divulsam fuisse observavimus. Intestinum ileum cum cæteris tenuibus intestinis inflammatum & quasi gangræna affectum, duarum fere spithamarum longitudine ab intestino colo vulneratum apparuit & portio illa, quæ ipsum respiciebat colon, octo circiter digitorum transversorum mensura per vulnus abdominis foras eruperat. Nullum neque exterius circa vulnus neque interius nempe in abdomine tumoris indicium reluxit; manifestabatur intestini laceratio præcise sub ligamento Falopii superiore in parte; inferius vero ad contactum partis superioris Femoris reperiebatur portio ejusdem intestini integra & incorrupta qua cum una protrahebatur pars peritonæi parumper extra abdomen extrusa. Ab eodem ileo dum manibus contrectabatur, prosiluit lumbricus ejusdem ac supradescripti indolis & naturæ. Materiam etiam serosam subrubri coloris, qualem ab inversi intestini vulnere excerni vidimus, dimidiæ circiter libræ pondere in infimo ventre stagnantem invenimus.

Vide fig.
ram 1.

Vide fig.
ram 2.

D

Co-

(a) *Gallice Piliers.*

Copiam vero non exiguam humoris illius foetidi & subobscuri, qui, narante ægro, ab inciso tumore effluxit, intra ileum intestinum conclusamprehendimus.

Ad eliciendam speciem & ideam hujusce morbi facem nobis prætulit non tam prominens in inguine tumor & qui præfuit immanis dolor & alvus adstricta & vomitus materiæ fetidæ & feculentæ, quam corporis extra inguen protursi continuatio cum intestino ileo ejusque incessus inter dictam tendinosam columnam & vasa cruralia juxta osis ischii articulationem cum femore, ex quo tamquam specialiore signo miserum hunc hominem hernia crurali laborasse perspeximus; quam & infrequentius in hominibus accidere, & non adeo difficillimæ curationis, ac periculi plenam esse experientia testis est.

Interea nos haud parum suspensos habuit illa dubitatio; num scilicet a vermibus haud parum erosam & perforatam fuisse, jam dictam ilei partem fateremur. Cui quidem dubitationi viam sternere videbantur vermes ipsi, utpote copiose ab intestini vulneribus ejecti & ex illorum genere, qui in tenuibus intestinis hospitari consueverunt: unde suspicari non immerito licebat, eosdem intra herniam diu reconditos mansisse, tandemque putribus suis succis & moribus intestini tunicas laxando & admordendo observatum in eo vulnus, si minus in totum, at magna tamen ex parte intulisse.

Opinioni huic momentum & pondus afferebat auctoritas Boerauvii (a) scribentis, quod illi *sugendo, moruendo, vellicando, rodendo, terebrando, chylum consumendo, nervos irritans, solida vulnerant, nausæas, horrores, cardialgias, vomitus, animi deliquia, maciem, famem caninam, tumorem abdominis & talia producant maxime flatus, subitoque tumores creant*; favere etiam huic sententiae videbamus Teophilum Bonetum (b) asserentem a lunbricis intestinum colon in virgine quadam perforatum se vidisse: Et (c) de abscessu in inguine ab hernia suppurata cum erosione intestini ilei, purisque & excrementorum foetidissimorum rejectione verba facientem.

Sed

(a) *In medicis Institutionibus* pag. 204. num. 792. ubi de *Intestinatorum vermibus* loquitur. (b) *In Sepulchro Anatomico* T. 2. obs. 12. pag. 219. (c) *Tom. 3. Sec. 3c. observ. 3.*

Sed ne aliorum recensendis observationibus immoremur, il-
lius meminisse sufficiat, quam in bononiensi nosocomio Sanctæ
Mariæ de Vita, coram solertissimis, peritissimisque rerum medi-
carum & anatomicarum professoribus quondam habitam fuisse
accepimus in defuncti cujusdam hominis cadavere, in quo inte-
stinum ileum instar cribi pertusum a vermibus ita depræhensum
fuit, ut illius foramina diametrum pennæ gallinacæ recipiendæ
parem ostenderent.

Quod si abscessum præ manibus se habere arbitratus scalpel-
lo herniam chirurgus aperuit, veniam tamen illi humaniter dan-
dam esse aperte hortabatur nimia patræ erroris facilitas in
hac re, in qua chirurgos etiam exercitatos & celebres nonnun-
quam hallucinatos fuisse constat. Testatur enim Joannes Astru-
cius, (a) bubones venereos cum enterocele interdum confun-
di; docetque Laurentius Heisterus; (b) herniam cruralem in-
guinali minorem & rotundiores esse, adeoque facilius cum bu-
bonibus confundi posse: Merius vero (c) aliquando, se de-
ceptum fuisse ingenue fatetur his verbis: *J' examinai la tumeur*
& trouvai une fluctuation dans toutes les parties, ce qui me fit croire
d'abord que c' étoit un Abscès ordinaire, & non pas un poulain,
& revera de hernia inguinali ipsum loqui, ex eadem historia &
curatione satis liquet. Verum ne rebus dubiis persequendis mo-
rosius hærrere videamur, aliorum iudicijs eas relinquentes, ad
inversionem ilei intestini nostram breviter animadversionem,
convertimus cuius causam ab hernia, multoque magis a vulne-
re repetendam esse arbitrabamur, nam cum pars intestini ilei,
quæ respiciebat colon a reliquo intestino tunc temporis trahi non
posset ob implicationem jam factam cum peritonæo, herniæ sa-
culo, tumoreque in inguine & more intestinorum tenuium
motum peristalticum, fortasse ob vulnus inversum exerceret;
hæc inquam pars ubi minorem inveniebat resistentiam eo pel-
lenda erat, unde accedentibus incommodis itineris longioris ad
eam quam diximus octo digitorum transversorum mensuram fo-
ras ex abdomine producta est.

D 2

Quod

(a) *Lib. 3. de Morbis Venereis Cap. 5. pag. 225.* (b) *In Institutionibus*
Chirurgicis part. 2. Sect. V. Cap. 118. (c) *In Historia Regia Sien-*
siarum Academia Anni 1701. Observations sur les Hernies 2. obs.

Quod si ennaratis incommodis addatur auxiliorum medicorum, chirurgicorumque inopia, facile intelligitur cur dicti intestini vulnus eo tempore ita increverit, ut ejusdem intestini ilei unitas quasi penitus soluta fuerit.

Partem intestini ilei intra colon, partemque intra ipsum ileum (secluso etiam tumore inguinis) in mortuis ex iliaco affectu interdum vidimus, videruntque multo antea Peyerus, ut in suo de glandulis tractatu legitur: Sylvius. (a) Lazarus Riverius. (b) Rene Jacques Croissant de Garengéot. (c) aliique: at ilei inversionem tantam extra abdomen porrectam, quantum in nostro casu numquam me vidisse, aut in aliorum scriptis legisse memini. Propterea prima fronte circa eandem ancipites fuimus, incerti nimirum an relaxato peritonæo, an vermiformi appendiculæ inflatæ & extanti, an tumori alicui novissime orto corpus illud in inguine prominens adscriberemus. Nam quo minus de intestino aliquo e sua sede pulso judicaremus, prima facie obstare videbatur illa observatio, qua constat intestinum ob vulnera, vel alia de causa herniam efficiunt, fere semper duplicia & sub forma arcus manifestari, figuramque & colorem aliter ac in morboisa ista affectione probebatur, exhibere. Verumtamen ubi omnia ejus antecedentia & adjuncta attentius scrutati fuimus, judicium de ilei inversione absolute, ferre non dubitavimus; cum præsertim signa & symptomata, quæ illiacum affectum comitari solent, explorata & comperta habuerimus.

Hic obiter notare licebit, apendiculam vermiformem præter morem in hoc subiecto longitudinem unius spithamæ prætulisse & supra peritoneum, cui uniebatur, cursum intestini colonicæ sequutam fuisse sensimque coarctatam tandem in acumen desisse.

Cum autem signa mox dicta certam & imminensem miseri ægrotantis mortem portenderent, idcirco a conclamata ægritudinis curatione per fortiora chirurgiæ præsidia ineunda abstinendum esse monuerunt. Eam vero quibus in casibus, quando & qua

-
- (a) *In Praxi medica lib. 1. Cap. XV.* (b) *Centuria tertia obs. 26.*
 (c) *Traité des opérations de Chirurgie Tom. premier à Paris an. 1731. ubi de Hernijs pag. 382.*

29
qua ratione aggredi prudenter liceat præcipere & explicare
non est hujus loci, cui fines dicendi præstituti sunt, extra quos
evagari non lubet: Quare a chirurgicæ magistris studiosos &
alumnos artis chirurgicæ ea petere oportebit, quæ ad hunc lo-
cum pertinere videbuntur. Atque inter cetera notitiam signo-
rum inter bubonem & herniam discrimen ponentium acuratus
quæzere, de quibus Joannem Astrucium in supra memorato
libro diserte loquutum fuisse reperient.



FIGU.

30 FIGURARUM EXPLICATIO

Figura Prima.

- AA Musculus oblique externus sive descendens abdominis in parte dextera.
- a a Annulus ejusdem musculi.
- BB Intestini ilei inversi & foras elapsi effigies.
- b b Segmentum arcus sive ligamenti Falopii sub quo intestinum ileon inversum eruperat.
- CC Vena & Arteria cruralis.
- c c Os pubis quod decussatim supercandunt fibrillæ externorum oblique descendentium musculorum abdominis.
- D Umbilicus.
- d Annulus musculi obliqui externi laevi lateris.
- eee Vasa spermatica cum appensis testiculis.
- F Femur dextrum.
- G Femur sinistrum.
- H Integumenta communia aliquatum reclinata.

Figura Secunda.

- AA Pars intestini colli.
- B Intestinum cæcum.
- b b Appendicula vermiformis longius protensa & in acumen definens.
- CC Intestinum ileon.
- DD Tractus intestini ilei inversi & foraseducti.
- d d Rima sive hiatus in eo transversim ductus.
- E Continuitas intestini ilei quasi penitus soluta.

Vidit D. Paulus Philippus Premuli Clericus Regularis Sancti Pauli & in Ecclesia Metropolitana Bononiæ Pœnitentiarius, pro Eminentissimo, & Reverendissimo Domino D. Prospero Laurentio Cardinali Lambertini Archiepiscopo Bononiæ, & S. R. I. Principe.

Die 20. Junii 1740.

Ad Excellentissimum D. D. Joannem Mariam Santini, ut videat & referat pro Sancto Officio.

F. Bonaventura Maria Grossi Vicarius Generalis Sancti Officii Bononiæ.

Die 22. Junii 1740.

Jussus recognoscere librum cujus titulus est. De raris quibusdam Hepatis aliorumque Viscerum affectibus Observationes Auctore Præclarissimo Viro Cajetano Tacconi, illum non solum attente legi, sed cum delectatione iterum legi, Chirurgicam non tantum observationem, sed & Anatomicam, ac Chemicam amplectentem; Cumque nihil aliud offenderim, nisi quod literatum hominem decet bene moratum, censo pro mea parte, ut imprimi possit, vulgarique dummodo ne secus Reverendissimo Patri videatur ad cujus voluntatem me omnino conformo.

Joannes Maria Santini Philosophiæ, & Medicinæ Professor, & Sanctissimæ Inquisitionis Revisor.

Die 22. Junii 1740.

Stante supradicta attestazione

Imprimatur

F. Bonaventura Maria Grossi Vicarius Generalis Sancti Officii Bononiæ.

... ..

... ..

... ..

... ..

... ..

... ..